

***Jawatankuasa Panel Semakan Teks Khutbah
Negeri Pulau Pinang***

- 1. SS Dato' Seri Dr. Haji Wan Salim bin Wan Mohd Noor
(Pengerusi)**
Mufti Kerajaan Negeri Pulau Pinang
- 2. YBhg. Ustaz Muhammad Fadzil bin Alias**
Pengarah, Yayasan Dakwah Islamiyah (YADIM) Pulau Pinang
- 3. YBhg. Ustaz Ahmad bin Hashim**
Penasihat, Pusat Pengajian Tahfiz Al-Quran (PPTQ)
Kolej Islam Teknologi Antarabangsa Pulau Pinang (KITAB)
- 4. YBhg. Ustaz Subki bin Mohamed**
Mantan Pensyarah Kanan, IPG Kampus Tuanku Bainun
- 5. YBhg. Dr. Mohamad Zaki bin Hj Abdul Halim**
Penolong Mufti, Bahagian Fatwa,
Jabatan Mufti Negeri Negeri Pulau Pinang
- 6. YBhg. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia
- 7. YBhg. Ustaz Ahmad Shahimi bin Senawi**
Pendakwah
- 8. Ustaz Mohd Hanif bin Omar @ Wahab
(Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)





Air Mata Ibu Ayah: Gembira Atau Duka?

24 Mei 2024M/ 15 Zulkaedah 1445H

الْحَمْدُ لِلَّهِ مُقَلَّبِ اللَّيْلِ وَالنَّهَارِ، تَذَكِرَةً وَتَبْصِرَةً لِأَوْلِي النَّهْيِ وَالِاعْتِبَارِ سُبْحَانَهُ
الْكَرِيمِ الْمُنْعِمِ الْغَفَّارِ.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ إِلَهُ الْأَوَّلِينَ وَالْآخِرِينَ،

وَأَشْهَدُ أَنَّ مُحَمَّدًا عَبْدُهُ وَرَسُولُهُ، أَرْسَلَهُ اللَّهُ إِلَى النَّاسِ كَافَّةً بَشِيرًا وَنَذِيرًا.

اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَىٰ آئِلِهِ وَأَصْحَابِهِ أَجْمَعِينَ.

أَمَّا بَعْدُ، فَيَا أَيُّهَا الْمُسْلِمُونَ، اتَّقُوا اللَّهَ! أَوْصِيكُمْ وَآيَايَ بِتَقْوَى اللَّهِ فَقَدْ فَازَ
الْمُتَّقُونَ. قَالَ اللَّهُ تَعَالَى: يَا أَيُّهَا الَّذِينَ آمَنُوا اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا
وَأَنْتُمْ مُسْلِمُونَ.

SIDANG JUMAAT YANG DIRAHMATI SEKALIAN,

Saya berpesan kepada diri sendiri dan menyeru sidang Jumaat sekalian, marilah sama-sama kita mempertingkatkan ketakwaan kepada Allah dengan bersungguh-sungguh melaksanakan segala perintah-Nya dan meninggalkan segala larangan-Nya. Mudah-mudahan kita menikmati kesejahteraan dan keberkatan hidup serta mendapat kebahagiaan di dunia dan di akhirat.

Sebelum meneruskan bicara, khatib ingin mengingatkan sidang hadirin sekalian, agar memberi fokus dan mendengar dengan sepenuh hati kandungan khutbah Jumaat hari ini. Elakkan diri dari leka bermain gajet, tidur dengan sengaja atau berbual-bual kerana perbuatan-perbuatan tersebut bertentangan dengan adab mendengar khutbah.



Marilah kita bersama-sama menghayati khutbah Jumaat yang akan membicarakan tajuk “**Air Mata Ibu Ayah: Gembira Atau Duka?**”

HADIRIN YANG DIMULIAKAN ALLAH,

Pinjamkan seketika telinga dan kalbu untuk hayati bait-bait bicara mimbar tengah hari ini. Semoga patah-patah nasihat ini sampai kepada hati dengan tenang, diiringi kasih dan sayang. Ungkapan rasa syukur yang mendalam atas nikmat besar kehadiran ibu dan ayah, adalah perlakuan yang terpuji. Oleh itu, marilah kita panjatkan rasa syukur yang tidak terhingga kerana dianugerahi nikmat yang sangat besar nilainya, iaitu kehadiran ibu dan ayah dalam hidup.

Hati ibu ayah jangan sesekali dibiarkan terluka. Jika itu terjadi, maka tiada lagi keberkatan hidup buat anak itu. Bagi sesiapa yang memiliki ibu ayah yang masih hidup, hargailah kesempatan ini sebaik mungkin. Inilah masa yang berharga untuk memberikan yang terbaik kepada mereka. Jika kita sudah kehilangan kedua-duanya atau salah seorang daripada mereka, peluang berbuat baik masih terbuka kerana ibu ayah sangat mendambakan doa anak yang soleh setelah mereka berpindah ke alam baqa’.

Perjalanan sembilan bulan mengandung, dengan segala kesakitan dan kesulitan, adalah lambang pengorbanan yang tidak terbalas. Kita sememangnya sangat terhutang budi kepada ibu dan ayah. Sebagai anak, kita tidak hanya dituntut untuk mengenang budi mereka semata-mata, bahkan juga memastikan kebahagiaan mereka sepanjang hayat. Kita perlu menghargai setiap saat bersama mereka dan berusaha menjadi anak yang berbakti serta berusaha untuk membalas jasa kasih yang tak terhingga ini. Usah menunggu tarikh-tarikh tertentu untuk meraikan jasa



kedua orang tua. Jadikanlah setiap masa yang ada sebagai peluang keemasan untuk berbakti kepada mereka.

HADIRIN SIDANG JUMAAT YANG DIRAHMATI ALLAH,

Ibu dan ayah adalah dua insan yang memberikan kasih sayang tanpa syarat, berbudi tanpa mengharapkan balasan dan berkorban tanpa henti untuk kebahagiaan si anak. Air mata seorang ibu dan ayah sering kali menjadi kisah perjuangan yang tidak didendang. Mereka bukan hanya menjadi pengasuh dan penyedia keperluan, malah mereka juga adalah pelabuhan hati kita. Berbudi tanpa balasan tercermin dalam segala tindakan yang mereka lakukan. Mereka tidak mengharapkan penghargaan juga tidak pernah menghitung berapakah bayaran pengorbanan yang telah dicurahkan.

Keberkatan yang kita nikmati dalam hidup berkeluarga adalah bukti curahan kasih sayang yang tulus dari seorang ibu dan ayah. Mereka bukan hanya menjadi penjaga dan penyokong, tetapi juga sumber kasih sayang dan kebijaksanaan yang memberikan warna sejati kepada perjalanan hidup anak-anak. Pengorbanan mereka tidak mungkin dapat dibalas walaupun seluruh hidup dikorbankan untuk mereka.

Realitinya, tiada tempat yang lebih tenang melainkan dalam pelukan hangat seorang ibu. Begitu juga tiada lengan yang lebih kuat untuk kita terus berpaut melainkan di sisi seorang bapa. Namun, apabila menyentuh soal kasih sayang antara ibu bapa dan anak, tidak ramai antara kita yang dapat mencerna nikmat sebenar yang dikurniakan Allah *سُبْحَانَهُ وَتَعَالَى* ini.

HADIRIN SIDANG JUMAAT YANG DIRAHMATI ALLAH,



Beza pengorbanan mereka kepada kita dengan pengorbanan kita kepada mereka adalah sangat besar. Umpama langit dan bumi yang kedua-duanya tidak pernah bersua. Ibu ayah menjaga dan memelihara kita untuk memastikan, kita hidup dan membesar dengan sebaik mungkin, bagai menatang minyak yang penuh. Kita pula menjaga mereka semasa usia tua sementara menunggu mati datang menjemput.

HADIRIN SIDANG JUMAAT YANG DIRAHMATI ALLAH,

Apakah tindakan yang sepatutnya kita lakukan demi kebahagiaan ibu dan ayah? Dalam kesempatan yang penuh barakah ini, suka mimbar memberi ingatan, lakukanlah yang terbaik untuk mereka berdua. Pastikan mereka adalah insan yang paling banyak mendapat ihsan dan khidmat yang terbaik daripada kita. Kenang dan hargailah kedua ayah bonda di mana sahaja anda berada. Merekalah selayaknya menghuni ceruk ruang rasa hati kita setelah Allah **سُبْحَانَهُ وَتَعَالَى** dan Rasul-Nya. Firman Allah dalam surah al-Israk ayat 23:

وَقَضَىٰ رَبُّكَ أَلَّا تَعْبُدُوا إِلَّا إِيَّاهُ وَبِالْوَالِدَيْنِ إِحْسَانًا ۖ إِنَّمَا يُبَلِّغَنَّ عِنْدَكَ الْكِبَرَ أَحَدُهُمَا أَوْ

كِلَاهُمَا فَلَا تَقُلْ لَهُمَا أُفٍّ وَلَا تَنْهَرْهُمَا وَقُلْ لَهُمَا قَوْلًا كَرِيمًا ﴿٢٣﴾

Maksudnya: “Dan Tuhan-Mu telah memerintahkan supaya kamu tidak menyembah selain Dia dan hendaklah kamu berbuat baik kepada ibu bapakmu dengan sebaik-baiknya. Jika salah seorang antara keduanya atau kedua-duanya sampai berusia lanjut dalam pemeliharaanmu, maka



sekali-kali janganlah kamu mengatakan (sebarang perkataan kasar) kepada kedua-duanya sekalipun perkataan “hah”, dan janganlah kamu membentak mereka dan ucapkanlah kepada mereka perkataan yang mulia (yang bersopan santun).”

SIDANG JUMAAT YANG DIMULIAKAN,

Pastikan air mata ibu dan ayah yang mengalir adalah air mata gembira, bukan sebaliknya. Walau bagaimana buruk sekali pun pandangan orang lain terhadap ibu ayah kita, bukan penghalang untuk kita menjaga mereka dengan penuh kasih sayang. Walau banyak mana sekali pun dosa yang telah mereka lakukan, itu bukan urusan kita. Tanggungjawab kita sebagai anak ialah meminta ampun kepada Allah **سُبْحَانَهُ وَتَعَالَى** agar dosa kedua ibu ayah diampuni Allah **سُبْحَانَهُ وَتَعَالَى**. Doa anak yang soleh akan membantu kedua-dua mereka mendapat tempat yang baik di akhirat.

Ingatlah, erti sayang seorang anak kepada ayah bukan melalui hantaran wang ringgit, tetapi dengan doa yang tidak pernah putus. Buat saudaraku yang masih punya ibu ayah, hargai sebaik mungkin. Sayangi dan berbaktilah kepada ibu ayah. Mereka adalah kunci syurga yang kekal abadi. Musibah kecelakaan dan kehinaan menjadi habuan anak yang mensia-siakan peluang hidup bersama ibu ayah sewaktu usia tua mereka. Rasulullah **صَلَّى اللَّهُ عَلَيْهِ وَسَلَّمَ** menegaskan hal ini melalui sabda Baginda:

**رَغِمَ أَنْفٌ ثُمَّ رَغِمَ أَنْفٌ ثُمَّ رَغِمَ أَنْفٌ. قِيلَ مَنْ يَا رَسُولَ اللَّهِ قَالَ: مَنْ أَدْرَكَ
أَبَوَيْهِ عِنْدَ الْكِبَرِ أَحَدَهُمَا أَوْ كِلَيْهِمَا فَلَمْ يَدْخُلِ الْجَنَّةَ**



Maksudnya: “Hinalah, hinalah, hinalah.” Baginda ditanya: “Siapa (yang engkau maksudkan) wahai Rasulullah? Rasulullah menjawab: “Siapa sahaja yang mempunyai orang tuanya ketika sudah lanjut usia, salah seorang atau keduanya tidak (menjadikannya sebab) masuk syurga.”

(Hadis Riwayat Muslim)

SIDANG JUMAAT YANG DIRAHMATI ALLAH,

Sekiranya ibu ayah semasa usia tua mereka memilih untuk tinggal bersama, maka ini adalah satu penghormatan yang tidak mungkin dapat kita cari di tempat lain. Kalau kita berpandangan ia satu bebanan, semakin mudahlah bagi syaitan untuk menusuk jarum-jarum halusnyanya supaya kita terhindar dari memberi khidmat kepada ibu ayah. Pelbagai alasan dicipta untuk mengelakkan diri dan akhirnya rumah orang tua lah tempat menghabiskan usia tua mereka. *Wal'iyazubillahu min zalik* (والعياذُ بالله من ذلك)

Kepada saudara-saudaraku yang telah kehilangan ibu dan ayah, jangan biarkan hati dan perasaan kita turut lupa kepada mereka. Teruslah berbakti dengan berdoa dan bersedekah jariah atas nama mereka, sebagai tanda hubungan hati yang tak pernah putus. Ingatlah anak soleh adalah talian hayat ibu ayah yang sudah meninggal. Selagi hayat dikandung badan, pastikan talian kebaikan mereka tidak akan kita putuskan. Ibu ayah anugerah berharga, tanpa mereka siapalah kita.

HADIRIN YANG DIHORMATI ALLAH,

Mengakhiri khutbah kali ini, berikut adalah beberapa perkara yang boleh dijadikan pedoman:



Pertama: Ibu ayah merupakan anugerah yang Istimewa buat setiap insan. Syukurilah dengan menunaikan hak kedua mereka sebaik mungkin.

Kedua: Cinta dan kasih ibu dan ayah adalah punca segala kebaikan. Luangkanlah walaupun sekelumit masa yang kita ada untuk berbakti kepada mereka sebagai luahan rasa kasih dan sayang.

Ketiga: Anak soleh adalah talian kebaikan ibu ayah. Teruskan doa dan sedekah jariah agar talian tersebut tetap terhubung.

Firman Allah dalam surah Ibrahim ayat 41:

رَبَّنَا اغْفِرْ لِي وَلِوَالِدَيَّ وَلِلْمُؤْمِنِينَ يَوْمَ يَقُومُ الْحِسَابُ ﴿٤١﴾

Maksudnya: *“Wahai Tuhan kami! Berilah ampun bagiku dan bagi kedua ibu bapaku serta bagi orang-orang yang beriman, pada masa berlakunya hitungan amal dan pembalasan.”*

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهَدْيِ سَيِّدِ الْمُرْسَلِينَ،
أَقُولُ مَا سَمِعْتُمْ، وَأَسْتَغْفِرُ اللَّهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ،
فَأَسْتَغْفِرُوهُ، إِنَّهُ هُوَ الْغَفُورُ الرَّحِيمُ.



Khutbah Kedua Bulan Mei

2024M/ 1445H

الْحَمْدُ لِلَّهِ عَلَىٰ آلَائِهِ وَإِحْسَانِهِ، وَالشُّكْرُ لَهُ عَلَىٰ تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعَظِيمًا لِسَانِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَىٰ رِضْوَانِهِ.
صَلَّى اللَّهُ وَسَلَّم عَلَىٰ سَيِّدِنَا مُحَمَّدٍ وَعَلَىٰ آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِينَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ
وَمَرْضَاتِهِ، ثُمَّ اْعَلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرٍ بَدَأَ فِيهِ بِنَفْسِهِ؛ فَقَالَ عَلِيمًا
حَكِيمًا:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا

﴿الأحزاب: 56﴾

اللَّهُمَّ صَلِّ وَسَلِّمْ عَلَىٰ عَبْدِكَ وَرَسُولِكَ مُحَمَّدِ بْنِ الْبَشِيرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنِ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ
إِلَىٰ يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ
وَالْأَمْوَاتِ،

اللَّهُمَّ أَعِزِّ الْإِسْلَامَ وَالْمُسْلِمِينَ، وَدَمِّرْ أَعْدَاءَكَ أَعْدَاءَ الدِّينِ وَأَنْصِرْ مَنْ نَصَرَ
الدِّينَ، وَاخْذُلْ مَنْ خَذَلَ الْمُسْلِمِينَ، وَأَعْلِ كَلِمَتَكَ إِلَىٰ يَوْمِ الدِّينِ.

اللَّهُمَّ أَنْصِرْ إِخْوَانَنَا الْمُسْلِمِينَ وَالْمُجَاهِدِينَ وَالْمُسْتَضْعَفِينَ فِي فَلَسْطِينَ وَفِي كُلِّ
مَكَانٍ، اللَّهُمَّ ثَبِّتْ إِيمَانَهُمْ وَأَنْزِلِ السَّكِينَةَ فِي قُلُوبِهِمْ وَوَحِّدْ صُفُوفَهُمْ.



اللَّهُمَّ وَفَّقْ قَادَتَنَا وَرُعَمَاءَنَا وَوُلَاةَ أُمُورِنَا لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَيَّ صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan Agong, Sultan Ibrahim dan Kebawah Duli Yang Maha Mulia Seri Paduka Baginda Raja Permaisuri Agong, Raja Zarith Sofiah.

وَكَذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْغَلَاءَ وَالرِّيَاءَ، وَالرَّبَا وَالزُّنَا وَالزَّلَازِلَ وَالْمِحْنَ وَسُوءَ الْفِتَنِ مَا ظَهَرَ مِنْهَا وَمَا بَطَنَ عَن بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ عَامَّةً يَا رَبَّ الْعَالَمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta dapat mengeluarkan zakat dan melaksanakan waqaf melalui agensi milik penuh Majlis Agama Islam Negeri Pulau Pinang (MAINPP) iaitu Zakat Pulau Pinang (ZPP) dan Wakaf Pulau Pinang (WPP).

Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, bangsa dan negara. Ya Allah! Kuatkan iman kami agar dapat menghindari perbuatan khianat, salah guna kuasa dan harta, memberi atau menerima rasuah dan segala perbuatan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.



عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَىٰ وَيَنْهَىٰ عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿٤٥﴾ فَادْكُرُوا اللَّهَ الْجَلِيلَ
يَذْكُرْكُمْ، وَاشْكُرُوهُ عَلَىٰ نِعْمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿٤٥﴾

